

Uzoshiya uProf. Z. K. Matthews eFort Hare

UZOSHIYA uProfessor Z. K. Matthews kanye noProfessor Nyembezi eFort Hare, isikole esidumile semfundo ephakeme yabansundu kuleli. UProfessor Matthews ulikhiphe lema ngesihloko leligama lokuthi useyashiya emhlanganweni wokugcina abekhuluma kuwo wekhansela ephethe lesikole.

Phela nayo ikhansela seyiya-gcina sekuzothatha entsha ekhethwe nguHulumeni phansi komthetho omusha ophase kulonyaka odlule wokuyithatha iFort Hare lena ayenze isikole samaXhosa kuphela.

Prof. Matthews uthe kaboni ukuthi angase asebenze eFort Hare phansi kwalomthetho kaHulumeni. Kulomthetho uHulumeni ufuna ukuba makaphume phansi kukaKhongolose (African National Congress), wathi lokho yena kakuboni.

Ukushiya kwakhe kumenze ukuba alahlekelwe imali yempheni, kwazise ukuthi besekusele iminyaka emabili ayithole esikhathini esingangeminyaka 23 afundisa eFort Hare. Amahemuhemu athi lokhu kushiya kwakhe kuzomlahlekisela imali engangezi-£6,000 abeyokuyithola emphenini yakhe.

Uzoqhubeka

Utshela amaphephandaba esiLungu ukuthi usazqhubeka nokufundisa, kodwa uzoyakofundisa kwamanye amazwe lapho angase athole khona isikhundla. Uma uHulumeni engenakumnika imvume yokuphuma kuleli ayosebenza kwamanye amazwe mhlawumbe useyofuna imvume yokuba ahambe unomphela.

Omunye wabafundi, uMnuz. J. M. Majola, ophethe inhla-

ngano yabafundi eFort Hare, utshela umhlangano lona khona eFort Hare ukuthi abafundi kabazimisele ngalemfundo entsha eza nalomthetho kaHulumeni oxoshe otisha abasikhombisa abamhlophe. Uthe: "Siyokulwa kuze kube sekugcineni ukukhombisa ukuthi kasiwuthandi lomthetho."

Usizo lwesikole

UProfessor R. Burrows, utisha omkhulu wesikole lesi, naye ongomunye wabaxoshiwe ukhulume kabanzi ngosizo nomsebenzi weFort Hare ekusakazeni umoya wokuzwana kuleli.

Uphawule uProfesors Burrows ngokuthi kwake kwabakhona izinhlebo zokuthi otisha baseFort Hare kanye nabafundi kabawenzi umsebenzi wabo. Kodwa bathi uma bephenya kuleli lonke bathola ukuthi ukuphumelela kwabafundi baseFort Hare kubabeka esigabeni sesibili kubafundi abaphumelele kulo lonke leli.

UDr. A. Kerr, owakhe wasiphatha lesikole isikhathi eside kusukela ku1916 kuya ku1948, utshela lenhlanganiso ukuthi noma kungabakhona abaphatheke kabi ngomthetho omusha lona, kungabayinto enhle uma bengabonelela izifiso zabafundi kuqala, ngaphandleke kokuba kukhona izinto ezithize ezingabaphazamisa.